

1176 Halloween.

Has das Jahr fascht vergässe, das Fäscht über allne Fäschter. Bis mir dä Lärm vor eusem Hus ufgfalle isch, am vergangene Donnschtig. D Chinder sind um d Hüser grännt, händ gschnitzti Chürbis umetreit, sind go lüte a de Hustüre und händ "Süesses oder Surs" verlangt und derbi ihri verunschaltete, agmalte Unghür-Gsichter zeigt.

Ha ihne dä Plausch ja möge gönne. Er isch ja vor e paar Jahr zu eus über cho, dä Bruuch, vo Amerika. Frag mich aber scho, warum mir dene Amis würllich alles müend nachemache, wo die sich usdänke. Chunnt mir grad nüt gschieds in Sinn wo i de letschte 10-20 Jahr vo dört äne zu eus cho isch. Dass jetzt eusi wysse Husmure i der Nacht mit rohe Eier müend gelb verziert werde, isch wahr - schynlich nöd grad das, wo eus wyter bringt. Dass d Briefchäschte bi eus a dem Donnschtig Abig mit Rasierschum gfüllt werde, isch ärgerlich wie vieles, wo us de USA importiert wird. Warum müesse mir alles dene Amis nachemache?

Warum imponiert eus erschtunlicherwys immer no alles us de USA?

Warum finde mir US-Beef immer no als öppis Speziells, obwohl dass me muess uf eme Schildli deklarieren, dass als Maa chasch Brüscht übercho, wenn zviel vo dem so zarte Fleisch würdisch ässe? Hormon-Medis sind da inbegriffe. Oder gluschtet es eus öppe nach dene US-Chlorhühner? Zum Glück het der Ueli der pendent Handelsvertrag, wo no nöd abgeschlosse isch nöd hei bracht, süsch müesste mir de Amis ihri Chlorhüener ab jetzt abchaufe (der Murer het gseit, er heig bim Händdruck mit em Schlossgeischt im "White House" uf en schnälle Abschluss drängt!!). Het er ächt drum so gschtralet bim Händedruck, euse Suppe-Chaschper, will er Kentucky-Chicken gässe het vor em Bsuech vom gröschte vo allne Schtaatsmänner uf der Erde? Me het grad gmerkt, wie ihm en Schuss i d Hose..... Ach lönd mir das doch! Ich ha mich jedefalls wäg dem Bild scho e chli geschämt, Schwyzer z`sy. So offesichtlich schlieme gseht nie guet us, bimene Schtaatsbsuech!!!

Ich jedefalls schtune immer wieder, warum der Trump jeweils nach em 30. Oktober, also nach Halloween, immer no twitteret und mit de Chinese wyter schtrittet um des Kaisers Bart. Scho s erschte Interview i der Tagesschau mit em Blondhaar-Donald am 1. November zeigt mir die uffallendi Ähnlichkeit vo siner Rüebe mit dene gschnitzte Kürbislaterne, wo d Chinder bi eus dur d Schtrasse träge. Und en riesige Vorteil hätti doch eine, wo em Trump sini Rüebe in Natura für en Umzug würdi bruche: Er müessti usse fascht nüt mache dra

und inne usechratze müsst er scho gar nüt, denn hohl isch sie ja inne au scho!! Nur chönnti me die Laterne nach en Gebruch nöd in Grünchübel tue. Denn me weiss, wie gern der Trump fascht täglich Hämbis schlückt. Und es Läbe lang Hämbis us US-Beef und Chlorhühner ässe, das isch nöd guet für euse Komposcht wo`s drus git, das isch doch sunneklar.

Übrigens, nöd nur der US-Präsident chunnt mir immer in Sinn, wenn ich so en Chürbis-Laterne gseh. In London git`s au no so en Schpezi, wo mir vor de Auge dureflimmeret wenn ich dä Halloween-Umzug vo der Chinder gseh mit de schöne Chürbislaterne vom Balkon abe. Hesch au e chli die Debatte im englische Parlament verfolgt i de letschte Wuche? Hesch en e chli beaugapflet, der Johnson, wenn er sini gschide Rede gschwunge het und sine Parlamentskollege oder Gegner d Levite gläse het. En Karikatur in Reinkultur!!! Und söttig Staats-Chefs füere hüt ehemaligi Grossmächt. Für eus Vorbilder? Das isch eher fraglich!

Jetzt fählt nur no der Italiener, der Salvini. Dä würdi au no passe i die Halloween-Rundi. Aber dä het leider keis Gsicht wo s mit em Trump und em Johnson chönnti ufnäh. Und hohl isch dä au nöd, aber gfährlich! Mir wird Angscht und Bang und ich bi jetzt froh dass ich scho 76 Jahr alt bin, chasch mir s glaube.

Also, wenn du öppe i de Ferie nach de USA gasch, den red doch e chli mit dine amerikanische Fründe und säg ne, der Trump machi für Halloween weniger Arbeit. Also ich will den scho präzisiere, ich meine nöd, es söll no eine uf d Idee cho, em Trump sini Rüebe....., nei, das han ich würklich nöd gmeint. Es längi sogar, wenn der gröschti Staatsmaa vo alle Zyte eifach im Umzügli mitlaufi, so han ich`s eigentlich gmeint!